

Cura è avunda avunda?

DA MARIA CADRUVI

■ **«Prendas anc in toc turta?» – «Na, grazia, jau hai avunda.» Blers da nus san cura ch'els han avunda, almain tar la turta. Tar ils daners vegni pli cumplitgà. Là vegn il sensori per la buna mesira negligì. «Adina dapli» para dad esser la vaira devisa.** Davos quella sa zuppan bramas e temas, plaschairs e garegiaments. Daners èn atgnamain materia morta u almain materia che dorma. Ma sche nus la svegliain sche savain nus construir ordlonder munds fitg differents – en la realitad ed en noss chau.

«If I were a rich man...». Sche jau fiss ina dunna ritga... lura na stuess jau betg lavurar per uschè dir, lura savess jau bajegiar ina gronda chasa, lura savess jau pupragnar tut mes chars cun chaussas che fan plaschair ad els, lura avess jau temp da far da quai che la glieud manege ch'i saja impurtant e lura faschess jau impressiun als auters.

Nus ed ils auters – quai è in dals blers aspects en connex cun ils daners. Natiralmain che nus vulain ils daners per nus sez. Ma cun noss possess vulain nus era far impressiun als auters. Betg tuts, ma

bain inqual ha gust e plaschair da sa participar en sia vita a quest gieù da concorrenza e cumpetiziun. Quel generescha da tuttas sorts ideas, era creativas – e sa chapescha era tactics maliziusas. Esser tuttina ritg sco l'auter n'ans basta lura betg. Nus vulain avoir dapli che l'auter. Pertge n'è betg adina cler. Cler è però che «adina dapli» nutrescha l'engurdientscha. E quella n'ha per ordinari betg cunfins – persuerter il potenzial da turblar la vesida clera e la buna mesira.

I vegn adina puspè raquintà che noss vegls uravian «Segner, ans pertgira da la ritgezza andetga.» Per dir la vaira vardad: Jau n'avess betg tema da la ritgezza andetga. In grass da sis en il lotto? Immediat! Ed jau na ma turpegel gnanc da dir quai. Cun far patratgs sur dals daners hai jau numnadamain constatà ch'jau sun plain cuntradizziuns. Jau conced che mes venter ha ina tscherta simpatia per dapli. Ma mes chau sa dar cuntrapais sch'el vul. Grazia a bleras experientschas sa el dir mintgatant cun persvasiun ch'i bastia. Ritga, vairamain ritga, è numnadamain quella persuna che sa dir: «Jau hai avunda.»

L'autura è anteriura redactura dad RTR